

Ehempel di un "drop out" di VWO cu awe ta un docente PhD na Universidad di Aruba!



ORANJESTAD(AAN)---: Mr. Dr. Rycond Santos do Nascimento a marca un momento historico pa Universidad di Aruba como e prome persona cu a logra su grado di Ph.D na Aruba. Su storia ta uno di exito cu no a cuminsa cu un relacion "comun y corriente" cu enseñansa, e no ta un excepcion tampoco, pero su decisionnan den su trayecto, su trabao duro, su determinacion y su logronan den su

buskeda pa un miho porvenir y un estudio avansa, tin como resultado cu awe Rycond ta considera un ehempel, un inspiracion y un role-model. Rycond Santos do Nascimento ta splica cu el a bay basisschool manera tur otro hoben. Despues di klas 6, el a bay Colegio Arubano y den VWO 5 el a drop out. Rycond Santos do Nascimento, actualmente Doctor of Philosophy, a traha den construccion y

despues pa dos aña a traha ta chapi curanan rond Aruba. E ta conta cu el a topa cu un señora cu ta traha na IPA, kende a puntr'e pakico e no ta sigui studia. El a inform'e cu e por haci un examen special, esta e "colloquium doctum" pa e keda acepta na IPA, aunke e no tin su diploma di VWO. Rycond Santos do Nascimento a tuma e reto na serio y tanten cu e tabata na IPA el a mira cu e por haci

e colloquium doctum tambe pa admision na e facultad di ley na Universidad di Aruba. Consecuentemente el a pidi permiso na IPA pa e tuma un luna pa prepara pa e examen pa drenta Universidad y esaki nan a dun'e tambe. El a haya su "calling", loke a capta su atencion y interes, na Universidad di Aruba. El a caba su estudio y a solicita pa traha na Universidad, unda cu el a bira y ta actualmente docente di "staats- en bestuursrecht".

Inicialmente, aunke su preferencia ta den e area di "Privaatrecht", tur cupo tabata yen caba y el a scoge pa e tema di "Buitenlandse Betrekkingen" den cuadro di "Staatsrecht" pa su investigacion, na momento cu el a opta pa sigui studia y pa e bay logra su PhD y asina bira Doctor. Durante cu e tabata trahando riba esaki, el a yega na otro topiconan relaciona na relacionnan cu exterior, esta Aruba su constitucion pa cu buitenlandse betrekkingen; y a ripara cu tabatin hopi pregunta rond di e estructura di Reino Hulandes. El a didi na enfoca riba e parti di

constitucion y esaki a bira tambe su investigacion pa su disertacion. A observa cu autornan huridico a indica cu falta informacion pa cu statuto particularmente pa loke ta trata e relacionnan cu Aruba, Corsou y Sint Maarten. Mester compronde e estructura di Reino pa por compronde hopi otro topico manera entre otro "toezicht" y "geschillenregeling" pa yeg na solucionnan, el a aña/i. Si no tin comprendemento di e estructura, no por compronde unda por haci cambio pa "hef op" deficit democratico y trece igualdad entre e paisnan, asina Rycond Santos do Nascimento a subraya. Mester considera tambe cambio den e situacion unda cu tin e pensamiento cu pasobra tin un pais grandi cu casi 17 milyon habitante, cu e pais grandi lo tin e ultimo palabra pa cu ley y maneho (bestuur) di e islanan. E punto di salida di Reino ta cu tin pueblonan den Reino y for di punto di bista di democracia mester duna un bos na cada pueblo pa por tuma decisionnan, el a bisa, esey ta locual falta den Reino na e momento aki. E mensahe cu Universidad di Aruba su prome Ph.D ta comparti cu comunidad ta basa riba e importancia di studiamento. Estudio ta un inversion den e futuro di e persona y henter su famia; un bon estudio ta conduci na un miho entrada y miho cuido di e famia. El a conclui bisando cu ora un persona ta hoben e ta kere cu e por solucionar tur problema su mes, pero hecho ta cu su experiencia cu un "papel" den su man hopi mas porta ta habri y tin mas opcion pa scoge, di dje. Mr. Dr. Rycond Santos do Nascimento ta gradici su famia, su señora y 3 yiu-nan cu a apoy'e y sosten'e den e trayecto dificil aki di ta casa, tata, docente y estudiante na mes momento.

Telefonnandi DIARIO
Tel: 582 6747
Fax: 582 8551